

Wolf - Rosenstein

I.

Per fin'amor m'esjauzira
tant quant fai chaut ni s'esfrezis;
toz tems serai vas lei aclis,
mas non puosc saber enqera
si poirai ab joi remaner,
o·m voldra per seu retener
cella cui mos cors dezira.

II.

Seinhors e dompnas gerpira
s'a lei plagues q'eu li servis;
e q'·m diria m'en partis
faria·m morir desera,
q'en outra non ai mon esper,
nuoit ni jorn, ni maitin ni ser,
ni d'als mos cors no consira.

III.

Ges tant leu no l'enquesira
s'eu sabes cant grieu s'afranquis;
anc res no fo no s'umelis
vas amor; mas ill n'es fera;
en domna non pot ren valer,
per riqessa ni per poder,
se joi d'amor no l'aspira.

IV.

Ja de sos pes no·m partira
s'il plagues ni m'o consentis,
o sol que d'aitant m'enrequis
que dices qe ma domna era,
e del plus fos al seu placer,
de la menzonja o del ver,
c'ab sol son diz m'enrequira.

V.

Entre joi remaing et ira
ades quant denan lei partis,
q'anc pois no la vi q'ela·m dis
qe si l'ames, mi amera;
mas eu no sai lo sieu voler;
mas ben pot ma domna saber

q?eu morrai si ganre·m tira.

VI.

Gencer en est mon no·s mira,
bell'e blancha plus c'us hermis,
plus fresca qe rosa ni lis;
ren als no m?en desespera;
hai! si poirai l?ora veder
q?eu puosca pres de llei jacer!
eu non, qar vas mi no·s vira.

VII.

Toz mos talenz m?aëmplira
ma domna, sol d?un bais m?aizis,
q?en guerrejera mos vezis,
e fora larcs, e donera,
e·m fera grazir e temer,
e mos enemics bas chader,
e tengra·l meu e·l garnira.

VIII.

E pot ben ma domna saber
que ja nulz hom de mon poder
de meillor cor no·ill servira.

IX.

E si·m fezes tant de placer
qe·m laisses pres de si jaser,
ja d?aquest mal non morira.

- letto 450 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wolf-rosenstein-5>